

«Forum per il talian en Svizra»

Porscher il rom d'instrucziun en mintga gimnasi

(gsc) Dapi 2012 datti in «Forum per il talian en Svizra», «associaziun da var tschinquanta uniuns che s'engaschan per promover e sustegnair lingua e cultura taliana en Svizra» («La Regione Ticino», 25 da schaner 2014, p. 21). I sa tracta d'applitgar l'art. 70.3 da la constituziun federala areguard il talian: «La confederaziun ed ils chantuns promovan la comunicaziun ed il barat tranter las cuminanzas linguisticas.» In tal barat duai pertutgar er il talian. En quest senn ha la Cumissiun svizra da matura (Csm) interpretà l'art. 9.7 da l'Urden federal da matura (Ufm): «En il rom fundamental ‘segund linguatg nazional’ duain ins porscher ina tscherna tranter almain duas linguas.» Questa disposiziun, tenor ina relaziun da la Csm, vegn respectada mo en la mesedad dals gimnasis (v. La Quotidiana dals 12 da november 2013). Ils 25 da schaner 2014, en la sala dal cussegl grond a Cuira, ha l'assamblea dal Forum, presidiada da cuss. naz. Silva Semadeni, vuschà ina moziun che «pretenda ch'il talian vegnia purschè sco rom da matura gimnasiala en mintga gimnasi, e quai sco rom fundamental e/u sco opziun speziala, (...) e

ch'el na vegnia betg lià da cunvegnas chantunalas u tranter chantuns che limitassan l'offerta da la terza lingua naziunala ad insaquants gimnasis. Nus suppli-cain la Conferenza svizra da las directuras e dals directurs chantunals da l'educaziun publica d'adattar ad uras l'Ufm areguard la legitimaziun dals attestats gimnasials, per garantir ina dignitat equivalenta a lingua e cultura taliana e meglierar l'offerta gimnasiala; questa, segund il rapport da la Csm, è preschenta mo en la mesedad dals gimnasis.»

Lingua munta cultura

L'approvaziun dal text surmenziunà è stada ina culminaziun da la dieta, en preschientscha dals cuss. guv. Manuele Bertoli (TI) e Martin Jäger (GR), sco era da l'ambassadur talian Cosimo Risi e d'in mantun personalitads politicas, mediaticas, culturalas, universitaras e professiuninalas. In'altra culminaziun è stada la decisiun da l'assamblea, senza cuntravusch, d'organisar il Forum ad in'unio; sin proposta da Jäger han ins lur elegì unanimain Bertoli parsura dal Forum, e secretari è vegni il Puschlavin Giuseppe Falbo, già secretari da la Pro Grizioni Italiano (Pgi). Ins ha era pudì emprender d'enconuscher Paola Gianoli Tuena (Coppet/VD), parsura nova da la Pgi. La romanista tessinaisa Tatiana Crivelli (Universitat da Turitg) ha declerà a «La Regione Ticino» dals 25 da schaner: «Ins bada l'emprim vair indizi da crisa cur che la plurilinguitad entschaiva, sco ussa, a dar ensem, (...) cun la sminuziun da las uras d'instrucziun da talian ordaifer il Tes-



La lingua na munta betg mo communicaziun, mabain ina convivenza da cultura, tradiziuns, modas da viver en in senn pli vast.

KEYSTONE

sin ed insaquantas votaziuns cunter las scolas bilinguas en Grischun – ussa vegn in auter referendum. La plurilinguitad s'indeblescha cun l'augment da l'englais (...). Ins dovra l'uscheditg englais dals eroports per communitgar; la lingua na munta però betg mo communicaziun, mabain ina convivenza da cultura, tradiziuns, modas da viver en in senn pli vast. Empreder la lingua d'in conuman e pruvar da la discurrer munta pruvar da sa metter en sia situaziun.» La «NZZ» dals 25 da schaner è s'infurmada tar Diego Erba, «coordinatur dal Forum, (...) il qual manegia ch'ins duaja promover il talian cunzunt a nord da las Alps (...). En Svizra

viva bunamain la mesedad dals 480 000 umans italofons ordaifer la ‘Svizzera Italiana’, pia gist là nua che la situaziun dal talian saja greva (...). I fa quità che la regenza da l'Argovia vul reducir marcantain l'offerta da talian en las scolas da district.» I dat avunda da discutar per la proxima dieta dal Forum, ils 9 e 10 da matg a Basilea. Il tema da lezza occurrenza tuna: «Il talian al cunfin». Il grond spezialist dals cunfins è l'economist Remigio Ratti (Ligiaun), anterius cuss. naz. ed instancabel parsura da «Coscienza Svizzera» (Blinzuna; segretariato@coscienzasvizzera.ch), «gruppo di studio e di informazione per la Svizzera Italiana». Er a Cuira era Ratti

da la partida. Basilea fa endament in illuster perscrutader svizzer da la cultura taliana: Jacob Burckhardt (1818–1897). Ils 9 da matg, di da l'Europa, fan ins endament la declaraziun da Robert Schuman (1886–1963) l'onn 1950 per «far l'Europa cun realisaziuns concretas che stgaffeschian solidaritads effectivas». I stgaffescha segir ina «solidaridad effectiva» sin stgalim europeic d'emprender talian, lingua d'in pajais limitrof cun 60 milliuns olmas, d'in dals principals partenaris kommerzials da la Svizra. Tut quai duess inspirar il Forum e sias quatter gruppas da laver: Il talian en las instituziuns, en l'educaziun, en la cultura, en il mund.